

WIGEMARK PORUČIO POLITIČARIMA: Fokusirati se na **reformu javne uprave**, a ne na raspodjelu pozicija

Wigemark je rekao da je **reforma javne uprave** izazov za sve zemlje Zapadnog Balkana, te je najavio da će svakako, kao jedna od tematika, biti obrađena u novoj Strategiji Evropske komisije (EK) za Zapadni Balkan, koja će biti predstavljena 6. februara.



*“Funkcionalna, učinkovita i nepolitizovana **javna uprava** neophodna je u svakoj zemlji i utiče na život i dobrobiti svih građana. Neophodno je da zemlje koje teže ka Evropskoj uniji imaju **reformisanu javnu upravu** kako bi se mogla nositi sa standardima EU”, istakao je šef delegacije i specijalni predstavnik Unije u Bosni i Hercegovini.*

On je napomenuo da postojanje efikasne **javne uprave** nije nešto što se odnosi samo na pružanje usluga građanima, nego je to pitanje koje ima posljedice i na privredu i cjelokupno društvo.

“Uprava kakvu vi imate ovdje nije u dovoljnoj mjeri efikasna, a to za posljedicu ima lošu privredu i jako je teško provoditi reforme. Vaši političari se obavežu na neke reforme, a onda ih ne mogu provoditi jer imate lošu javnu upravu. Imajući u vidu da je ovo izborna godina, vjerujem da će tema efikasne javne uprave biti jedna od tema u izbornoj godini i da će se stranke baviti ovim pitanjem u izbornim kampanjama, a ne da se sve svodi na raspodjelu pozicija nakon izbora”, poručio je Lars Gunnar Wigemark političarima u Bosni i Hercegovini.

U uvodnom obraćanju učesnicima konferencije o izazovima javne uprave u Sarajevu, predsjedavajući Savjeta ministara BiH Denis Zvizdić rekao je da Evropska unija pomaže Bosni i Hercegovini u svim reformama na putu ka Uniji, te da je potpuno jasno da su transparentna javna uprava i profesionalni državni službenici neophodni da bi sve službe u našoj zemlji bile na usluzi građanima i da se omogući BiH da se prilagodi pravnoj stečevini EU.

“Jedan od ključnih dokumenata je Reformska agenda koju je Vijeće ministara ispunilo u većini i još imamo reformu javne uprave, reformu javnih finansija i zakon o državnim službenicima. Nadam se da ćemo uskoro objaviti da smo završili sve obaveze iz Reformske agende. Nije tačno da se na Reformskoj agendi ne radi ništa. Godinama se ranije nije radilo ništa. Osam godina je put Bosne i Hercegovine ka Evropskoj uniji bio stopiran. Ovo Vijeće ministara sa drugim nivoima vlasti i predstavnicima EU je dinamiziralo proces evropskih integracija, predali smo aplikaciju, dobili Upitnik koji će biti završen i to je put kojim želimo ići”, naglasio je predsjedavajući Savjeta ministara BiH Denis Zvizdić.

On je izrazio nadu da će Bosna i Hercegovina uskoro dobiti novu Strategiju javne uprave i da će, kako je rekao, “svi nivoi vlasti dati saglasnost i da završimo taj posao”.

“U drugim državama postoji jedan zakon o planiranju javne uprave, a kod nas ih imamo 13. Kad kažemo da hoćemo jedan zakon, onda budemo optuženi da se zalažemo za centralizaciju i prenos nadležnosti. Nismo zadovoljni dosadašnjim rezultatima, ali smo opredijeljeni da radimo i da se zalažemo za reformu javne uprave”, poručio je Zvizdić.

Ekspert SIGMA-e za reformu javne uprave Primož Vehar, koji se također obratio učesnicima konferencije, rekao je da je državna uprava koja je efikasna i funkcionalna uslov ne samo za članstvo u Uniji, nego i za početak pregovora i status kandidata za EU.

“Evropska unija nema jasna pravila, pa se postavlja pitanje kako države napreduju. Zato je SIGMA u saradnji sa EU izradila smjernice. Pripremili smo za sve zemlje Zapadnog Balkana izvještaj, pa tako i za Bosnu i Hercegovinu koja ima složen ustavni poredak”, rekao je ekspert Primož Vehar.

Ključni izazovi za strateški okvir javne uprave koji još nije usvojen, kaže Vehar, su zapošljavanje, prije svega, kroz politička imenovanja, zatim transparentnost budžeta, te javne nabavke i njihova usklađenost sa direktivama EU.

Koordinator za reformu javne uprave Dragan Čuluzan rekao je da su analitički nalazi i preporuke SIGMA-e korisne informacije, kao i diskusije iz Evropske komisije.

“Ocjene koje nam daje SIGMA su jasan pokazatelj za nastavak reforme javne uprave, što rade i druge zemlje u procesu pridruživanja Evropskoj uniji. I dalje glavni izazov predstavlja nedostatak podataka, pa nije bilo moguće ocijeniti Bosnu i Hercegovinu u nekim poglavljima. Pozivam institucije da dostave podatke kako bismo dostavili validne informacije Evropskoj uniji”, zaključio je Čuluzan.

(BHRT/SB)